

Jetzt bin i scho im Ruhestand  
woos ansich ja ganz schee sei kannt.  
Vamissn tua i manches gwiss.  
Weil des jetzt alles nimma is.

Koa Pfarra, dems allweil pressiert.  
Koa Mensch, der dir in d'Arbat stiert.  
Koa Mesner, der se laut beklogt,  
dass eahm koana nia wos sogt.  
Koa Telefon, des dauernd leit.  
Koa Schadenfroher, der se freit,  
wenn wos schief geht irgendwo.  
und Koana, der ois besser ko.

Koane Büacha mehr zum führn.  
Koa Kircha net, zum renoviern.  
Koa Chormitglied,des se beschwert.  
Koa Ministrant, der pampig werd,  
Koa Ärga mit da Saalbelegung  
und mit da Küch aa koa Aufregung.  
Net amoi mitm Pfarrgemeinderat  
Des alles is scho ziemlich fad.

Früher war i stets in da Pflicht.  
Auf wos i jetzad ois vazicht,  
Auf Hinterbliebene, die trauern.  
Auf Ehrenamtliche, die dauernd  
globt und anerkannt sei wolln.  
Auf Leit, die dauernd Messn zohn.  
Auf Faxgeräte und Maschinen  
de, wenss pressiert, fast immer spinnen.

Auf Prozessionen im großen Stil.  
Aufs alte Weiberl, halb senil,  
de se ins Pfarrbüro neistellt  
und langsam ihr ganzs Lebn erzählt  
wenns dir ganz fürchterlich pressiert

weil Gottesdienstordnung net fertig wird.  
Auf Pfarrbrief, Weihnachtn und Ostern  
und auf de Leit, die imma mosern.

Es war net leicht, dahom zu bleibm?  
Niamoils mehr a Taufe schreiben!  
Wo des jetz doch so einfach geht,  
wo alles im PC drin steht.  
Dahoam kriegst koane schwarzn Finga  
von dene Druck- und Kopiergerätsdinga.  
Und neahmad schafft Stipendien oo.  
Koana stört se dann mehr dro  
wenn d'Abrechnung für de Organisten  
eigentlich scho vorgestern gmacht sei müssten.

Koa Pachtfeld und koa Kindagartn  
koane Leit, de bloß drauf wartn,  
dass's gegn d'Friedhofsgebühren schimpfa kinna.  
und jammern, weils d'Handschuah nimma finna.  
Koane Bettler, koan hektischen Priester,  
und koane notorischen Besserwisser.

Und überhaupt koa Kirchenverwaltung  
mit manchmal unbeugsamer Haltung  
die locker beschließt, wos doch net geht  
und nachad aa no do drauf bsteht.  
Koa olte Frau, de bei dir woant.  
Koa Supergscheite, de glei moant  
sie müasst dir de Levitn lesn,  
weil du ihre Messen host vagessn.  
Koane Ehrenamtlichn, de se streitn  
mei Leidln, des san – scheene – Zeitn

Ihr frogts eich, wia des guat geh ko?  
Zum Glück hob i ja no mein Mo!